



18. november 2020

Atassut

UKA 2020/131

Bentiaraq Bendtsen Ottosen

**Innarluutilinnik sullissisutut atorfillit ilinniagaqarnissamut, ingerlaqqiffiusumik ilinniagaqarnissamut pikkorissarnissanullu pisariaqartitsinermik naammassinnittussamik ataavartussamik Naalackersuisut periusissiorlutillu iliuusissatut pilersaarusiornissaannut piunasaqarfigineqarnissaat pillugu Inatsisartut aalajangiiffigisassaattut siunnersuut. Periusissiami iliuusissatullu pilersaarummi suliniutaasut anguniagassatut allassimasunut naapertuunnersut piffissap ingerlanerani nalilersuisarnissaq ilaassaaq. Periusissiatut iliuusissatullu pilersaarut saqqummiunneqassaaq kingusinnerpaamik UKA2021-mi.**

(Inatsisartunut ilaasortaq Sofie Geisler, Inuit Ataqtigiit)

Inuit timimikkut innarluutillit aamma eqqarsartaatsimikkut innarluutillit pitsaanerusumik atugassaqartinneqarnissaat periarfissaqartinneqassapput, taamatuttaarli pitsaasumik ingiallorteqarnermikkut sulisorisat ilinniagaqassutsikkut qaffasissumik inissisimanissaat qulakkeerneqartariaqartoq isumaqarpugut. Kisianni pingaaruteqarpoq angajoqqaajusut oqariartuutaanik tusarnaarluartarnissaq, tassani qulakkeerneqartussaammat inuit timimikkut innarluutillit aamma eqqarsartaatsimikkut innarluutillit ulluinnarni inooriaasiat ilisimalluarnissaat.

Nunatsinni inuit timimikkut innarluutillit aamma eqqarsartaatsimikkut innarluutillit immikkoortinneqanginnissaat ataqqineqarnissaallu pingaaruteqarpoq, qulakkeerumallugu inuiaqtigiini peqataatinneqarnissaat soorlu ilinniartitaanikkut kiisalu sulisinnaassuseq naappertorlugu periarfissiinikkut.

Inuit innarluutillit pisinnaatitaaffiisa pillugit qaamarsaanikkut tamanna politikkikkut naalaarnissaq pingaaruteqarpoq, isumaqarpugulli avaqunneqarsinnaangitsoq Tilioq peqatigalugu inatsisitigut tamakkiisumik periusissiamik Naalackersuisut suliaqartoqartariaqartoq.

Inatsisitigut pisinnaatitaaffiit naappertorlugit qaammarsarneqartuarnissaat allatuulli avaqunneqarsinnaanngilaq. Inuit innarluutillit tamanit peqataatinneqassapput, kisiannili ataqqineqassaaq nammineerlutik aaliangikkaminnik arlaatigut pisariaqartitatik naappertorlugu siammasissumik aaliangeeqataanissaat.

Siunnersuuteqartup anguniagaa naappertorlugu sukannersumik Naalackersuisut iliuusissatut periusissiamik suliaqarnissaat pissusissamisoortut Atassummiit isigaarput, nalunnginnatsigumi inuit innarluutillit illersuisuat Tilioq amigaateqarluni suleriussissiamik tusagassiorfitsigut nalunaaruteqaqqammersoq. Tamanna isiginngitsuusaarsinnaanngilarput.

Kalaallit Nunaat isorartuupilussuovoq, nunat immikkoortui ilaasa inuit innarluutilinnut immikkut atugassaqartitsisarput. Tamanna inuit innarluutillit akornanni qaamarsaasoqassappat Kommunit

tallimaasut akornimminni inuit innarluutillit pillugit periusissiaasa pitsanngorsartuarnissaat avaqqunneqarsinnaanngilaq. Tamanna siunnersuuteqartup isaanit taperseeqataanissarput avaqqussinnaanngilarput, isumaqaratta inuit pisinnaatitaaffii peqatigalugit naligiimmik inuit innarluutillit pisinnaatitaaffiit qaammarsaqqittariaqartut.

Kisianni mianerilluinnartariaqarparput pisortaqarfiit akornanni eqiterussinerujussuaq, taamaammat oqariartuutigaarput Tilioq uani pisumi peqataatilluinnartariaqartoq. Eqiterussinerujussuaq pinngitsoortilluinnartariaqarparput, allat aamma akisussaaffeqarput suleqatigiinissamullu isumaqatigiissuteqartarlutik. Qitiusumit aqutsinerujussuaq annikillisarneqassaaq Kommunit, kattuffiit assigisaallu ataatsimoorlutik suliap ingerlanneqarnerani peqataatinneqarunik.

Siunnersuut Atassummiit isumaqatigalugu Ataatsimiititaliamut susassaqtumut ingerlateqqipparput.